

**Nostalgia Selat Tebrau 1961**  
*12 Mei 2008, Utusan Borneo, ms.8*  
*Oleh Jakaria Dasan*

Jawatankuasa Perundingan Perpaduan Malaysia (MSCC) dianggotai oleh wakil dari Tanah Melayu, Singapura, Sarawak, Brunei dan Sabah. MSCC dipengerusikan oleh Donald Stephens, seorang ahli tidak rasmi dalam Majlis Undangan Negeri Sabah. MSCC ditugaskan untuk mengumpul dan membandingkan pelbagai pandangan tentang Malaysia di ketiga-ketiga wilayah yang terlibat. MSCC juga berperanan menyebarkan maklumat bagi menggalakkan perbincangan untuk mempercepatkan kesedaran penduduk, terutama di wilayah Borneo terhadap cadangan Malaysia. Bagi memenuhi tujuan itu, MSCC berusaha mencapai persefahaman di kalangan pemimpin politik untuk memberi penjelasan yang berkesan ke arah pembentukan Malaysia.

Sejak persidangan Persatuan Parlimen Komanwel di Singapura dan pertemuan melalui MSCC mulai bulan Julai hingga Disember 1961, beberapa rombongan lawatan dari ketiga-tiga wilayah Borneo terutama dari Sabah melawat ke Tanah Melayu dengan mula menyeberangi Selat Tebrau ke Negeri Johor. Kumpulan ini telah mendapat gambaran yang lebih jelas betapa Negeri Sabah kelak akan dapat dibangunkan dengan lebih cepat jika bersama dengan Tanah Melayu yang telah merdeka pada tahun 1957. Malah penyertaan Sabah dalam merealisasikan kewujudan Malaysia akan menjadikan negara ini lebih kuat. Lawatan itu telah memberi keyakinan kepada para pemimpin ini dan sejurus selepas itu gerakan kemerdekaan negeri Sabah menerusi Malaysia berjalan dengan lancar. Dalam benak fikiran para pemimpin pada masa itu mungkin telah merasakan bahawa

walaupun negeri Johor telah mendahului gerakan pembangunan, mereka yakin bahawa Sabah juga mampu mengejar dengan rapat pembangunan yang telah dikecapi.

Setelah hampir 46 tahun merdeka, jurang pembangunan negeri Sabah dan Johor masih wujud dengan ketara tetapi jika dilihat dari aspek kerancakan pembangunan yakni gerakan pembangunan yang berlaku di Sabah pada masa ini, tidak dapat dinafikan bahawa putaran pembangunan di negeri Sabah bergerak dengan lebih pantas. Ini dapat kita lihat dengan jelas jika kita tidak mengambilkira Negara Singapura yang berjiran dengan negeri Johor sebagai faktor kepesatan pembangunan di negeri itu. Sesungguhnya terdapat beberapa aspek untuk kita mengukur sesuatu pembangunan yang melibatkan negeri-negeri di Malaysia. Salah satu daripada aspek yang boleh digunakan ialah dari sudut prestasi institusi pendidikan yang terdapat di negeri-negeri itu. Adalah tidak wajar untuk kita membezakan usia sesuatu institusi sebagai kayu pengukur utama. Sebaliknya kesediaan sesuatu institusi untuk menghadapi cabaran masakini perlu turut diberikan perhatian. Antara cabaran-cabaran itu termasuklah mewujudkan pendekatan-pendekatan yang boleh melebarkan lagi sumbangannya kepada masyarakat yang tidak seharusnya terhad kepada sesebuah negeri sahaja.

Atas kesedaran ini, maka UMS Link Holdings Sdn Bhd (ULink), selaku syarikat milik penuh UMS untuk mengendalikan aktiviti-aktiviti pengkomersialan produk-produk inovasi dan R&D UMS serta mengurus program-program akademik komersial telah mengadakan suatu Perjanjian Persefahaman (MOA) dengan Kumpulan Pendidikan Yayasan Pelajaran Johor (KPYPJ) bagi membolehkan Yayasan Pelajaran Johor (YPJ) menjalankan

program-program UMS secara francis di Johor. Di antara program yang akan dilaksanakan oleh YPJ kelak ialah Pengurusan Perhotelan/Hospitaliti, Pengurusan Pelancongan dan Kewangan/Perbankan Islam. Bertitik tolak dari pelaksanaan program ini, maka kerjasama ULink-YPJ kelak akan dilebarkan dalam bidang-bidang lain seperti pertanian, akuakultur, industri dan lain-lain lagi. Majlis Menandatangani Perjanjian Persefahaman ini telah diadakan pada 8 Mei 2008 bertempat di Hotel Puteri Pacific, Johor Bharu. Naib Canselor UMS, Prof. Datuk Dr. Mohd Noh Dalimin dan Prof. Dr. Roselina Ahmad Saufi, Pengarah ULink, telah mewakili ULink manakala Dr Sha'ari Mohd Nooh, Ketua Pegawai Eksekutif YPJ, dan Timbalannya mewakili KPYPJ. Majlis ini telah disaksikan oleh YB Dato' Maulizan Bujang, Pengurus Jawatankuasa Pembangunan Usahawan dan Koperasi, Pelajaran dan Pengajian Tinggi Negeri Johor sebagai mewakili YAB Menteri Besar Johor.

Kumpulan Pendidikan Yayasan Pelajaran Johor telah ditubuhkan pada 3 Mac 1996 dan merupakan syarikat milik penuh kerajaan negeri Johor. KPYPJ telah mengalami perkembangan yang pesat sejak itu dan kini terbahagi kepada dua kumpulan utama iaitu YPJ Holdings yang mengurus bahagian pelaburan dan KPYPJ yang mengekalkan fungsi asasnya iaitu dalam bidang pendidikan. KPYPJ dengan motto “Akademik Cemerlang, Sahsiah Terpuji” bertekad menjadi sebuah institusi pendidikan yang menyediakan peluang pendidikan di peringkat pengajian tinggi kepada para pelajar lepasan SPM yang layak tetapi tidak mendapat peluang atau tempat di IPTA. Selain itu, ianya juga beroperasi sebagai pusat meningkatkan pelbagai jenis kemahiran dan keusahawanan yang mereka (pelajar) minat untuk diceburi

secara khusus. Pinjaman kewangan diberikan kepada para pelajar yang ingin melanjutkan pengajian menerusi KPYPJ tanpa mengira dari negeri mana mereka berasal. KPYPJ bakal mendapat sebuah kampus induk yang akan dibina di daerah Kulai dengan keluasan tapak 100 ekar dan 350 ekar lagi untuk pembangunan bandar baru KPYPJ. Dengan pembangunan kampus ini kelak, jumlah pelajar seramai 200 orang yang mampu ditampung pada masa ini akan dapat ditambah lebih ramai. Sekaligus membuka lebih banyak peluang kepada kumpulan pelajar yang datang dari serata negeri dan juga dari luar negara.

Secara langsung, perkembangan MOA ini akan turut memberi peluang kepada anak-anak Sabah untuk menimba pengalaman sambil belajar di negeri orang sebelum mereka kelak diterima masuk melanjutkan pengajian ke UMS. Selain mengikuti pengajian di KPYPJ, maka menerusi hubungan-hubungan industri KPYPJ dengan pengusaha-pengusaha industri di Semenanjung akan membolehkan para pelajar KPYPJ mengikuti latihan industri selama enam bulan atau dua semester. Dalam ucapan YB Dato' Maulizan Bujang, wakil YAB Menteri Besar Johor, beliau menyatakan bahawa Kerajaan Negeri Johor amat mengalu-alukan perkembangan ini kerana ianya bukan hanya mengeratkan lagi ikatan persahabatan para pelajar khususnya dari Negeri Sabah dengan masyarakat negeri Johor malah ianya akan tambah mengeratkan lagi jalinan perhubungan kepimpinan kedua buah negeri seperti mana eratnya jalinan hubungan para pemimpin politik Negeri Sabah dan Johor selama ini. Yang Berhormat Dato' Maulizan menceritakan bagaimana beliau turut bersama-sama dengan pemimpin-pemimpin negeri Sabah menjelajah ke beberapa kawasan di Sabah. Banyak peristiwa menarik yang beliau sukar untuk ceritakan

dan gambarkan keistimewaannya. Maka melalui hubungan ULink dan KPYPJ, masyarakat negeri Johor juga akan dapat mengetahui lebih banyak mengenai negeri Sabah.

Prof. Datuk Dr. Mohd Noh Dalimin, Naib Canselor UMS, yang telah 17 tahun tinggal dan berkhidmat di Negeri Sabah, seorang anak watan dari Parit Raja, Batu Pahat, dalam ucapannya turut menjelaskan betapa masyarakat negeri Sabah adalah suatu masyarakat yang mudah mesra dengan kekayaan kepelbagaian etnik, adat dan budaya yang unik. Sebab itu, UMS begitu prihatin dan gigih menonjolkan identiti masyarakat Sabah yang istimewa ini melalui pendekatan UMS-Universiti Rakyat (URakyat). Tanpa mengenepikan usaha meningkatkan kredibiliti dan kualiti akademiknya, UMS yakin bahawa pendekatan URakyat berupaya untuk menonjolkan kepada dunia bahawa kewujudan sesebuah universiti itu adalah atas tujuan memenuhi tuntutan dan keperluan rakyat. Tuntutan dan keperluan utama rakyat itu adalah untuk mendapatkan didikan ilmu yang tinggi yang dengannya akan dapat meningkatkan kehidupan rakyat.

Bersempena dengan MOA itu juga, rombongan UMS yang terdiri daripada Prof Datuk Dr Mohd Noh Dalimin, Prof. Madya Dr Kasim Hj Mansur (Dekan Sekolah Perniagaan dan Ekonomi), Prof. Dr. Roselina A. Shaufi (Pengarah ULink), Dr. Rosita Chong (Dekan Sekolah Pengajian Kewangan Antarabangsa Labuan, Yuzaini Yuzlan (Ketua Program Pelancongan), Yusak Umboris (ULink) dan Jakarta Dasan (Pegawai Khas Naib Canselor) telah diberikan taklimat mengenai pembangunan Wilayah Iskandar yang dijenamakan sebagai ISKANDAR Malaysia. Sepertimana Koridor Pembangunan Sabah (SDC), ISKANDAR Malaysia turut

menekankan perkhidmatan berteraskan pendidikan (*Educational Services*) sebagai salah satu komponen utama dalam menjayakan matlamat ISKANDAR Malaysia. En Ismail Ibrahim, Pesuruhjaya Kebangsaan ISKANDAR Malaysia telah menyampaikan taklimat berkaitan. Beliau menjelaskan bahawa ISKANDAR Malaysia juga lahir dari kesedaran bahawa Malaysia (kepulauan melayu) suatu waktu pada kurun ke-14 berjaya menjadikan wilayah ini sebagai pusat perdagangan yang termasyhur. Justeru dengan perkembangan semasa yang menyaksikan kebangkitan ekonomi Negara China dan India, pembangunan ISKANDAR Malaysia malah SDC itu sendiri adalah relevan dan tepat pada masanya.

Berbanding dengan negeri Sabah, Johor mempunyai persaingan yang agak sengit dengan menyaksikan persaingan ekonomi sebuah negeri (Johor) dan sebuah Negara (Singapura). Walaubagaimana pun, ini tidak menjadi suatu cabaran yang menakutkan sebaliknya ia juga menjadi penyumbang kepada ekonomi negeri Johor khasnya dan Malaysia amnya jika ISKANDAR Malaysia dapat dilaksanakan mengikut pelan yang disediakan. Lebih penting dari itu ialah dengan mempastikan keupayaan Negara menghasilkan tenaga kerja yang berilmu pengetahuan dan berkemahiran tinggi (*knowledge and competent workforce*). Sehubungan itu, UMS dan institusi pengajian tinggi lainnya perlu memperkasakan graduan-graduan yang dilahirkannya dan memberi perhatian kepada usaha menghasilkan graduan yang benar-benar memenuhi keperluan industri. Langkah mengikuti perkembangan graduan yakni setelah mereka tamat pengajian juga wajar diberi kan perhatian agar graduan-graduan ini mampu berbakti kepada negara sebagaimana diharapkan. Melalui Jabatan Hal Ehwal Pelajar dan Alumni, UMS akan

lebih kerap mengadakan siri-siri perjumpaan dengan alumninya dimana sahaja mereka berada. Dalam lawatan ke Johor Bharu umpamanya, Naib Canselor telah mengambil kesempatan bertemu dengan beberapa orang alumni UMS untuk mengetahui perkembangan mereka.

“Sejak tahun 1994, iaitu setelah 14 tahun dengan 15,000 graduan dan 15,000 lagi sedang mengikuti pengajian di UMS, mungkin kita sudah boleh melihat dan mencongak perentingnya peranan yang telah dimainkan oleh UMS. Hampir pada setiap sektor, UMS mempunyai “*personal touch*” kepada setiap kejayaan yang dikehendaki oleh negeri ini (Sabah). Mungkin tidak salah jika saya katakan bahawa kejayaan Air Asia ke Sabah itu juga disebabkan oleh UMS, yakni mengambilkira bilangan pelajar, graduan dan keluarga mereka yang datang dari luar Sabah. Termasuklah program-program berkaitan UMS yang mana tidak dapat ditampung oleh MAS, tetapi dapat ditampung oleh Air Asia. Saya pasti jika kita soroti kejayaan-kejayaan industri yang lain, UMS juga telah sedikit sebanyak memainkan peranannya.” Prof. Datuk Dr. Mohd Noh Dalimin.

MOA yang ditandatangani di antara ULink (UMS) dan KPYPJ telah mencetus kembali nostalgia Selat Tebrau yang bersamanya disandarkan harapan melihat pembangunan negeri Sabah yang mapan melalui pembentukan Malaysia pada 31 Ogos 1963. Keupayaan untuk menyeberangi Selat Tebrau samada melalui darat, lautan dan udara, dengan begitu kerap pada masa ini dan seterusnya, merupakan suatu kejayaan yang tidak pernah terfikir oleh para pemimpin yang baru habis menghadiri persidangan MSCC di Singapura pada Disember 1961. Bermula dengan hanya sekumpulan kecil pemimpin dari Sabah

bertandang ke Tanah Melayu melalui negeri Johor pada masa itu, kini sekumpulan besar pemimpin-pemimpin kecil (pelajar) dari Sabah akan berpeluang untuk melanjutkan pengajian Francais ULink dan KPYPJ sambil melihat kepesatan ISKANDAR Malaysia di Johor. Bersandarkan nostalgia Selat Tebrau, pemimpin-pemimpin baru dari UMS mampu melonjak pembangunan negeri Sabah melalui ikatan persefahaman yang termeterai di antara ULink dan KPYPJ.